

JUMAAAT 26 OGOS 2016

BAPA INSPIRASI DERMA DARAH

Permatang Pauh: Pengalaman menyaksikan bapanya menjalani rawatan dialisis tiga kali seminggu membuatkan pelajar perempuan Politeknik Seberang Perai (PSP) di sini, Nur Hanisah Kaulan, 22, bersemangat menyertai Program Derma Darah Satria yang dianjurkan pusat pengajiannya itu, semalam.

Nur Hanisah yang mengikuti jurusan Kejuruteraan Mekanikal Tekstil berkata, dia menjadikan bapanya sebagai sumber inspirasi setiap kali ada program menderma darah dan semalam adalah kali ketiga dia menderma darah.

Menurutnya, bapanya, Kaulan Raji, 66, menjalani rawatan dialisis di Hospital Pakar Sultanah Fatimah (HPSF) di Muar, Johor, sebanyak tiga kali seminggu sejak 11 tahun lalu dan di-

Bapa inspirasi derma darah



NUR Hanisah menunjukkan pek darah yang didermakan pada Program Derma Darah Satria, semalam.

sebabkan itu timbul semangat dalam dirinya untuk menderma darah.

"Setiap kali membawa bapa melakukan rawatan dialisis, saya mula menyedari

sumber bekalan darah amat diperlukan pesakit dialisis.

"Kesedaran itu membuatkan saya tidak akan melepaskan peluang untuk membantu masyarakat di luar sana yang amat memerlukan bekalan darah," katanya.

Nur Hanisah berkata, dia pernah mengalami demam panas selama seminggu apabila menderma darah buat kali pertama ketika mengikuti Program Latihan Khidmat Negara (PLKN) Kumpulan 1 Siri 9/2012 di Ayer Keroh, Melaka.

Bagaimanapun, katanya, pengalaman itu tidak mematahkan semangatnya untuk sekali lagi menderma darah di PSP pada program dianjurkan awal Januari lalu.